

7704.



UNIVERSITEITSBIBLIOTHEEK GENT



900000157401

J. C. SCHRÖDERI

D E

Prospero Victoriarum cursu, quem ad Danubium, tum alibi, sociæ Britannorum, Batavorum Germanorumque copiae, brevissimo temporis spatio confecerunt, proximâ æstate hujus labentis Anni CIO IO CCIV.

ORATIO,

habita Medioburgi, auctoritate publica, in illustris Gymnasii Auditorio, pridie indictam supplicationem.



MEDIOBURGI,

Apud Bartholomeum de Later, Typographum,

Illustribus & magnificis Viris.

D.D. Martino Veth, Domino in Westcap-
pel, Niculandia & Nieuwerven.
J.U. D. Reipublicæ Medioburgensis
cum maxime Consuli.

D.D. Johanni Petro van den Brande, Dy-
nastæ in Cleverskerken, J. U. D. Rei-
publicæ Medioburgensis Consulari: Equiti
Baronetto, antehac apud sacratissimæ memo-
riæ Britanniarum Regem Gulielmum ter-
tium, Nobilium ac Potentium Zelandiæ
Ordinum omine, Legati munere functo.

D.D. Johanni de Reygersberg, Dynas-
tæ in Couwerve & Gapingen J.U. D.
Civitatis Medioburgensis Consulari, So-
cietatis Indicæ ad Cameram Zelandiæ
Gubernatori.

D.D. Johanni Schorer J. U. D. nuper Civi-
tati Medioburgensium a Secretis, nunc
ejusdem Syndico.

Ut & plurimum reverendis Viris

D. D. Danieli Hoornbeek, *Ecclesiæ Medioburgensis Pastori fidelissimo*, post emerita, cum summa laude, complurium annorum stipendia, piâ placidaque senectute, in administrata ἀρχιεπισκοπικός Provinciâ acquiescenti.

D. D. Nicolao Schorer. } *Ecclesiæ Medioburgensis*
D. D. Petro Immens. } *Pastoribus fidelissimis, doctissimis*

Illustris Gymnasii Medioburgensis Curatoribus
spectatissimis perpetuam felicitatem.

*S*ubjicio vestris oculis in præsentia, amplissimi ac plurimum reverendi D. D. Curatores, maximarum foederatæ Belgicæ Victoriarum qualicunque adumbratam colore imaginem, hac fretus animi fiducia fore, ut non dedignemini vestro adpectu chartæum illius munusculum, quem perorantem nuperrime prosecuti fuistis studio tam prolixo. Quod adeo non tam mei, quam quidem ipsius argumenti respectu uti credam in animum induco meum. Cum enim suspiciat Vos Respublica & Ecclesia, qui omni cura, studio & quotidianis votis in salutem Patriæ feramini: hujus certè publicam lætitiā, tenuibus licet philyris innexam, vobis ingratam accidere haud posse persuasissimum habeo. Quod superest, Deum ter Opt. Max. suppliciter veneror, ut vos, spectatissimi viri, Rei. publicæ, Ecclesiæ & Scholæ quam diutissime sospites conservet,

Vovebam Medioburgi Zelandiæ, ipsis idibus

Sept. A. CIO IOCCIV.

Honoris & Dignitatis vestræ Cultor devotissimus

Johannes Casparus Schröderus.

J. C. SCHRÖDERI

D E

Prospero Victoriarum cursu, quem ad Danubium, tum alibi, sociæ Britannorum, Batavorum Germanorumque copię, brevissimo temporis spatio confecerunt, proximâ æstate hujus labentis anni CIO IO CCIV.

ORATIO,

Habita Medioburgi, auctoritate publica, in illustris Gymnasii Auditorio, pridie indictam supplicationem.



Humanarum rerum, quamdiu futura sperantur, ea est ratio, ut expectatione eventus suspensos teneant mortalium animos: præsentibus autem ubi fuerint, pro variâ sui conditione diversis afficiant modis. Oriri id adeò ex innato omnibus beatitudinis desiderio liquido constat, cujus quidem vi sibi maximè conducibilia experunt singuli Undè spes & metus, lætitia & dolor primas & postremas sibi in hoc mundi theatro vindicant, in tantum quidem, ut ipsum corpus, cujus servitio utimur, eodem secum trahat animus, sensuque eventus aut erigat, aut dejiciat. Adamantina hæc est lex, cui nemo

8 *De Prospero cursu Victoriarum*

non natorum hominum subest, exercitura nos, quoad
 reciproca incertarum rerum vicissitudine jactabimur.
 Pugnet quis secum, nitatur ultra vires, ut omnem læ-
 titiæ ac doloris sensum exuat: næ ille cum Stoicis sese
 turpiter dabit; ac suâ opinione victor victum se affecti-
 bus agnoscat aliquando quamlibet invitus. Maximè
 vero illa nos afficiunt, quæ benè secusve gesta com-
 munem omnium salutem stabiliant aut prodant. Hæc
 enim ad quanto plures pertinent, tanto magis nos ma-
 vere par est. Id adeò nobis cum maximè usu venit,
 Aud. Huic ex quo contra Galliarum Regem arma cepe-
 mus pro Libertate, proque communi ac justa causa.
 Vidimus proximâ ætate, ut alias, Giganteos utrinque
 bellorum apparatus, contractas auxiliasque novis delec-
 tibus subindè copias, instructas classes, parata arma.
 Ingentia rerum molimina horruimus invicem. Nos
 hostiles, ipsi nostros impetus inter spem metumque du-
 bii tacitis utrinque animis pensavimus. Nunc jacta est
 alea. Benè habet! nobis alluxit! Speratis læta, in-
 certis cæta, lætitia sollicitudini successit. Versantur
 nobis ante oculos consilii in Ducibus ac fortitudinis au-
 spiciatissimæ in militibus autem nostris stupendorum
 facinorum imagines. Cum itaque in media hac bello-
 rum rabie, facta nobis videre licuerit omni spe majora:
 cum res nostras non modo fartas tectas servare conti-
 gerit ab hostili flammâ ac ferro, verum etiam novis iden-
 tidem

tidem incrementis augere : cumque, uti nunc quidem est, his tantis bonis invitemur ad lætitiā, canendasque Deo ter Opt. Max. laudes : agite, Audit. humaniss. frontes mecum exporrigite, positoque metu ad spem, ad fiduciam volmet componite. Quod ut agatis, lustrabitis mecum ingentem illum Victoriarum cursum, quem foederatæ copię, hoc anno, singulari quodam propitiū Numinis favore, virtute prorsus incredibili peregerunt. Legetis vestigia, per quæ ad æternum nominis decus grassati fuerunt nostri heroës. Captas urbes, verberata moenia, expugnatas fossas juxta mecum stupebitis. Ad quæ dum accingor, dicentem me ut secundis auribus prosequamini etiam atque etiam rogo.

Dum inclinatæ hostium res in Germania sustentaret Bavarix Princeps, improbaque spe ab Rege Gallorum ablatas arma armis, virosque viris sociaret, regiones vexaret, ad arces, urbes expugnandas vires animosque Gallis adderet, ipsam denique imperatoriam dignitatem animo devoraret, opimam scilicet lati Gallis auxilii futuram mercedem : paruit Foederatis, bellum illic spe exiguâ, eventu prorsus infelici duci, frustra se futuros, nisi consensionis iste Gallico-Bavaræ globus disjectus esset. Stabat ergo laboranti Germaniæ succurrere, conjunctasque manus cum hostibus tam arcto foedere sociatis conferere. In Germaniam, adulto annive, cum delectâ copiarum manu tendit inclutus Dux Marl-

8 *De Prospero cursu Victoriarum*

Marlborugiæ. Per flumina, per difficiles ascensu colles, non intermisso, per ipsas octo hebdomadas itinere, spurcâ adhæc imbribus & grandine tempestate, ad hostiles stationes perventum. Erat statim maximarum rerum præsigium hostilis pavor, qui locis natura & arte vallatis ita se tenebant, ut nisi de coelo venturis aditus patere non videretur. Quantam interim expectatio hæc Germanica nostram sustinuerit expectationem meministris Aud. Ornatiss. cum in dies singulos maximarum momenta rerum huc aut illuc inclinanda viderentur. Sed nec fortissimus Marlborugiæ Dux, nec paratissimæ illius ad pugnandum copię diuturnam nobis hanc sollicitudinem esse voluerunt. Cognito enim non exiguam hostium manum ad Donavertam desiderare castris vallo fossaque munitis, nec sui in campo facere potestatem; primam suæ virtutis testem, illam hostilis soli speculanti delegit Imperator maximus. Huc ergo tendens cum inclinato jam in vespere die venisset, festo; incredibile dictu, milite pugnam occupat, prius quam rutilum illud coeli sidus fortitudinis Anglo-Batavæ spectaculo sese subduxisset. Exhortati suos quique Duces hostilia munimenta in altissimo solo collocata tentant. Cum primum fragor tormentorum utrinque misceri horrifonitus, perque coeli vergentis crepuscula offusæ caliginis flammæ volitare. Sed Martios animos nequequam Martis terrificant minæ, Ruunt, quo

quo consciam virtutem, quo Ducum vestigia ferre vident. Et quamvis semel atque iterum pedem referre coacti fortius certamen repetunt: donec more ingentis procellæ, per oppletas suorum cadaveribus fossas, per spissam creberrimorum ictuum grandinem viam sibi aperiunt devota morti capita. Ibi verò dolor & indignatio viros ad cædem incendere. Obterunt sternuntque omnia. Augebat hosti miseriam ipsa tantæ cladis contemplatrix urbs Donaverta, quæ irruptionem victricium copiarum metuens, portas fugientibus occluserat. Unum desperatis refugium pons in Danubio. Quem conferto agmine insistentes laxata materiæ compages alveo fluminis immerfit. In hac Orciniana turba memorantur quatuor Episcopalis dignitatis viri, in rheda sedentes, eâdem cum cæteris ruina oppressi. Adeo nec sacerdotalis infula, nec veneranda sanctitatis species ipsos a fatali illius diei calamitate vindicare potuit, quin innoxius spiritus ultricibus aquis intercluderetur. Sic nostri longè lateque Victores castris cum omni opulentia bellicoque instrumento poriuntur, compluribus de hostibus captis, paucisque adeo pugnæ superstilibus, qui aciem ferri nando effugerant. Quo te interim modo affectum fuisse dicemus, incluse Donavertæ moenibus præsidarie miles? quid cupiebas? quid optabas? Nunquid animi tibi erat retinendæ urbi, postquam deletum videres tam speciosum Norici exercitus robur?

10 *De Prospero cursu Victo-
riarum*

undantes sanguine tuorum subjacentes campos? nudata propugnaculo urbis latera? feratis licet præ vobis spem hujusce defensionis, aliud longè consilii vos inire coget circumstans victor exercitus. Altera post pugnam lux tantum quod præterierat; cum hostes latronum more se clanculum portis eripiunt, per pontem Danubio junctum tumultuario agmine properantes. Quæ via ne nostris ad insequendum pateret, rescisso a tergo ponte providerant. Hæc illius expeditionis tirocinia dixeris, si cum sequentibus conferas. Quanquam illa in nostris Ducibus magnitudo animi singularis, in militibus autem stupenda ad dimicandum alacritas hoc uno specimine luculenter admodum sese probaverint.

Prosecuturus dehinc Victo-
riarum cursum fortissimus
Dux Marlborougus tertio nonas Julias Danubium co-
pias trajicit, in hostile solum terrorem nominis latè
circumlaturus. Direptionibus, incendiis complures
pagos vastat, si qua Bavarum Ducem suarum rerum curâ
ad meliorem mentem adigere posset. Verum nec re-
ducta in cineres ædificia, nec miserorum ærumnæ vil-
licorum, neque adeo ipsius Augustæ Conjugis inter-
cessio obstinatum animum quicquam flexerunt Marpe-
sîa caute duriorem. In tantum promissorum ab Gal-
lis subsidiorum fiducia sibi blandiebatur Princeps, ut
hujus respectu contemneret immanem istam hostilis ig-
nis populationem. — Quidni autem persuasum habea-
mus,

mus, visum ita fuisse supremo humanarum rerum Moderatori, ut ad aliud immortale nominis decus nostris viam panderet? Festinat ecce Tallardus, flore Gallici exercitus, ac gloriâ proximi anni stolidè ferox, sed mox futurus ingentis cladis accessio. Hujus in conatus, iter observando, tragulam injicere adornat illustrissimus Princeps Sabaudia Eugenius. Sed frustra; Junguntur Bavaris Galli qui paulo ante binis castris disfederant.

Hic quis miretur animos crevisse hostibus, quos prioris pugnae fortuna paulo ante perculerat? Itaque non nisi magna praesumere Galli cum Bavaris, optare vindictae occasionem, & victoriam jam quasi suam reputare. Quid ni vero digna adeo res fuerit prospera hae duorum exercituum conjunctio, ab quam miserit Bavariae Princeps, qui Gallorum Regem lætâ alicujus victoriae, brevi obtinendae, spe implerent? Sed vanum augurem cæco sui amore in fata praecipitem ferri videte. Relictâ ad Augustam Vindelicorum tutissimâ suis statione Danubium trajicit, oppressurus de improvise, ut putabat, Celsissimum Eugenium, qui ab hac Danubii ripa obsidionem Ingolstadii sub Illustrissimo Badensium Principe inceptam, mutuis operis cum fortissimo Marlboroughia Duce esset tecturus. Et profectò hæssisset res, ni prudentissimus Princeps de periculo, in quo versaretur, certiolem fecisset acerrimum Collegam, ab in-

feriore fluminis parte hostilibus motibus invigilantem. Arrigite mihi nunc jam aures, Audit. Hum. quodque longè maximum totoque orbe. stupendum facinus nuperrimis nunciis accepistis in admirationem defixi, illud nunc cum maxime præsentes intuemini. Satagenti de hostium adventu illustrissimo Eugenio succurrit strenuissimus Marlborougus. Statim ac sine morâ expensis in concilio sententiis Ducum, hostem insequenti luce aggredi placet. Fervidis ante commissam pugnam votis summi Numinis opem implorant. Annuere supplicantibus visa est mota divina Majestas: adeò intrepidus, adeò constantibus animis viam ad hostes affectant. Jam in conspectu erant hostilia castra. Sed primus ad ea penetrare labor: quippè quæ tali posita erant loco, ut aggressuris prius cum palude, quam cum hostibus foret decertandum. Sed nulla virtuti invia est via.

Superatur hoc quicquid est incommodi. Jam comminus res agi coepta. Jam dextrum Germanorum & auxiliarium cornu cum hostilibus turmis manus conferere. Ubi inclutus Sabaudix Princeps Eugenius cunctis ordinibus obequitando, dispersos colligendo, suæ quosque virtutis admonendo, summi Ducis munia exsequitur. Ab sinistro cornu eximia virtute conspicuus illustrissimus Marlborugix Dux, delecta Anglorum Batavorumque manu summæ rerum præerat, in omnes partes

partes intentus oculis & animo, curantibus hinc inde aliis magni nominis principibus viris. Digna inprimis admiratione res, ipsoque eventu notabilis: quatuor summæ virtutis Duces, hinc Marlborougium cum Tallardo, inde Eugenium cum Principe Bavaro videre commissos. Pugnatur diu ancipiti Marte, obstinatissimis utrinque animis. Videte autem hic immaturum & luctuosum planè hostibus gaudium. Cedentibus paululum Germanis, sinistra hostium acies jactis in altum pileis, Victoriā! Victoriā! ingeminat clamore insolenti. At modum pone, Galle, ferociæ, tuque lætitiā cohibe, Bavare, intempestivā. Nescitis enim, nescitis, quantum cladis ac doloris vobis instet. Adest continuò laborantibus fortissimus Dux Marlborugiæ cum Anglis suis & Batavis. Qui profligato sinistro cornu per medios hostes perrumpat, qui inclinatā dextrā aciem restituat, quique hostem paulo ante insequentem gradu, spe, lætitiā depellat. Olætam rerum conversionem! Victi pene palmam victoribus eripiunt. Jam una cunctos hostes perniciēs manet fugam & receptacula spectantes. At nihil usquam ruti. Ingruit immixtis habenis eques, incompōsitā sternens & obterens hostium cohortes. Ab altera parte Danubius, fatalis illa ad interitum Gallorum Bavorumque unda, nostrorum impulsos telis, catervatim, horribile visu, rapido secum æstu volvit. O miseram

14 *De Prospero cursu Victiciarum*

rerum faciem! O foedam hostium cladem nullius oratione exprimendam! Quis enim obtrita equorum ungulis hostium corpora, quis madentes sanguine fuso campos, quis expirantium gemitus, quis acerbis fugientium lamentationes narrando persequi valeat? Fugis fugatisque hostibus, paululum quiddam sociato exercitui ad justam victoriam erat moræ. Sex & viginti cohortes, cum duodecim turmis equitum, opportunitate vicini pagi adductæ, defensionem sese parant. Sed quantuli erat laboris vincere, quos suorum clade perculos metus & trepidatio jam debellaverant? Itaque post brevem minarum jactationem ad unum omnes Victoris sese arbitrio permittunt. Dum quoquo versus nostri hostem dispellunt, ut ventus folia: in silvam Herciniam abdit sese Baviaræ Princeps, trahens secum paucas equitum turmas unicum turpis fugæ solatium. Hic ferarum latibulis mirum, medius fidius, ni Fontem-bellaqueum, aut Versalias præoptaverit, & Gallicarum illic audire cantus Sirenium, quam hic silvestrium monstrorum ululatus. Sed huc revertamini, Audite. Hum. contemplantes mecum regalem illam hostilium castrorum abundantiam, quâ potitus sit sociatus exercitus: Præter cuncta verò tormenta bellica, quæ hostibus erepra sunt, quis non stupeat illam armorum vim, vivis juxta ac cælis detractorum? Quis captorum multitudinem hostium justo pene exercitui æqualem

non

non attonitus legerit? Tum verò, quod omnes vel maximum arbitremini, cui non fide majus visum fuerit hostem, tantâ locorum opportunitate munitum, adhæc aliquot millium numero superiorem, castris esse exutum & ad internecionem deletum? Nunc supremos hostium Duces videte, aut in prælio captos, aut ex fuga reprehensive. Vestram fidem, Aud. quantam turbam! Nunc ipsum Tallardum conspiciate, opima cellissimo Marlborugiæ Duci spolia cedentem. O foedam tanto viro fortunæ conversionem? Qui quondam potentissimi Ludovici Legatus superbum comitatum regni Anglorum sedi invexerat, idem nunc ex Duce captivus miserum suarum sordium spectaculum Augustæ Britannorum Annæ, ut ferunt, objiciet.

O incredibilem victoriam per omnes fastos & annales victuram! O decus sociati exercitus, laude usque virenti coronandum! O singularem illustrissimi Ducis Marlborougii fortitudinem, pari cum prudentiâ conjunctam! O eximium animi robur invictissimi Principis Eugenii! Quibus verò laudibus vos prosequar, cæteri copiarum Duces laureati? Quibus vos, indomitæ virtutis heroës, milites strenuissimi? Facta vestra ostentabunt erecta de victis hostibus tropæa, reportatæ manubiæ, signa, vexilla. Martium Anglorum ardorem, avitam Batavorum fortitudinem, adhæc masculam Germanorum virtutem undis secum auferet Danubius in

16 *De Prospero cursu Victoriarum*

Pontum, ultra Sarmatas famâ didendam & mundi latus, quod nebulæ & malus urget Jupiter. Quinam illi fuerunt viri, qui fossas, qui paludes studio pugnandi transilierunt? qui hostilem imperum corporibus intercluserunt suis? quorum omnium vulnera in pectore; omnium in manibus enses; quidam hostibus suis immortui. Victricia suorum arma jacent Græci pariter ac Romani. Clades hostibus illatas & inusitatæ virtutis prodigia crepent: habemus & nos in nostro milite, nostris in Ducibus atque hac victoria, quod veteribus illis si non anteponi, certè æquiparari posse videatur. Quid Themistocles, quid Agesilaos, quid Camillos, quid Calpurnios desideramus, qui Marlborougios, qui Eugenios ostentamus? quis vero Iphicratensibus militibus aut Fabianis Anglos, Batavos, Germanosve sub Marlborougio vel Eugenio in ferrum ruere suetos proponendos censeat? aut quis pervetustam illam Granici famam, quis Arbelorum gloriam pulcherrimo nos ad Donavertam & Danubium exitu adæquasse neget? quis denique injuriarum me postulet, si hanc victoriam non gloria, sed solo annorum intervallo posteriorem esse contendam illâ ad Ticinum adorcâ, qua Carolus Quintus Franciscum I. Gallorum Regem vivum cepit, profligato illius exercitu?

Beatam ergo patriam, quæ quidem defensores nacta est fortes adeò atque hostibus metuendos! beatos vos, mag-

magnanimi Proceres , patriæ Patres , quibus pressum ingenti curarum pondere animum tam læta , tam insperata victoria recreare licet ! beatos nos universos ac singulos , quorum a cervicibus remotum est hostile ferrum , quod omnibus impendebat ! Quotus autem quisque est , qui sibi quidem repræsentans imaginem contrarii casus , non totus horreat ? At hæc mala , quorum cogitationes ipsa mens expavescit , hæc victoria in fractos hosse avertit. Macti estote hac prudentia ac fortitudine , vos invictissimi copiarum Duces , clarissima quique suarum gentium sidera ! Macti estote hac virtute , generosi animi , milites strenuissimi ! vestris consiliis , vestris ausis patriam , socios belli Reges , Principes , omnes denique bonos porro demeremini. Dum sic ad Orientem sæva belli tempestas detonuit , ad occidentem nihil erat , quod hostium latebras metuere-
mus. Quippe diffisi viribus fossis sese tenent , inque dies singulos oblatum a nostris certamen detrectant. Verum enimverò nectentem moras Bedmarum , si non ad pugnam , certè ad prospicienda suorum incendia , vexationes , direptiones adactum vidimus , nostris in hostile solum longè lateque excurrentibus , pecunias imperantibus , prædasque inde agentibus haud contemnendas. Quod ipsum ad communem Sociorum causam non exiguum contulisse momentum quis dubitet ? restantur

D

illud

18 *De Prospero cursu Victoriarum*

illud sanè hostes, qui hisce nostrorum grassationibus malè sibi timentes, auxilia, quantum possunt, ex Germania arcessunt; tanto minus ad Rhenum metuendi, quanto magis ad Mosam auxiliis indigent.

Quod si propinquius nobis hostile territorium speculare lubeat, & hic dignam triumpho materiam offeramus. Quanto commodis, quam famâ majus est, quod Isabellæ arcem, nostris incubantem limitibus, armis virisque satis instructam, ipso pene copiatum nostrarum conspectu ad deditionem compulimus? quod sic hostem longius a finibus nostris abesse coëgimus? quodque illi nunc adempta sit facultas, ducenda ab hoc propugnaculo fossâ, liberam nostrorum excursionem inhibendi? Hoc autem quale sit æquiori lance pensabimus, si cogitemus; quantum ad nostram animorum securitatem pertineat, arctos illos, quos possidemus agrorum terminos, ab omni decremento servate incolumes, nec hostilia signa quotidie expavescere: sed liberorem spiritum ducere, sed extra teli jactum positos, sed metu vacuos, in ipsa sævientis belli procella, placido frui otio.

Quid interea temporis egerint, seu potius, post quæ cæcæta latuerint Hispani & Galli, non ignoratis Audite. Hum. Unum præterire nequeo audaciæ illorum molimen: quod ut eventu frustraretur, propitii Numinis

minis ope sanequam conspicua provisum fuit. Aucti namque adventitiis ex Germania copiis, novem circiter equitum millia, ex singulis delecta turmis, Bergas ad Zomam ablegant, hoc consilio, ut opportunitate locorum ab his celeriter occupatâ, intonantibus missiliuna ampullarum & craterum explosionibus, in tecta illius urbis sævirent. Ita quidem proposuerant hostes: ut data Brugis ac Namurco ab nostris flammis damna contrariis damnis solarentur. At videte quis casus, quamque levis hæc minas interceperit. Tendentibus more militari (quem delectis copiis peculiatem esse ferunt) hostibus, sine signis, sine vexillis ad destinatam urbem, una nostrorum equitum turma occurrit. Hanc prius conspicati hostium emissarii sub signis ad se duci, ulteriori agmini nunciant, intellectos sese esse: quippe quod conspexerint hostem una cum signis appropinquare, non dubitare se, quin ingenti multitudine suum adventum essent excepturi. Facile persuasum omnia sinistra suspicantibus. Supprimunt hostes iter, atque ab incepto desistunt. Quis verò hic non agnoscat singulare divinæ providentiæ argumentum, hostem vano metu, ab objecta ex improvviso præda, ab opportunitate gerendæ rei avocantis?

Postremo, si Oceanum respiciamus, non benignior illic hostibus aura adspiravit. Mitto interceptas illo-

rum plurimas naves, ipsisque pene faucibus ereptas, quas Americanis aut Gallicis mercibus graves, per spumantis undas salis in nostros portus adduci vidimus. Illud ad animum revocetis rogo, qua virtute hostilium impetum triremium nuperrimè fregerint nostri maritimi heroës. Ad cujus enim aures undantia istius dièi machinarum bellicarum murmura non sunt advoluta? Cujus oculos propemodum non implevit surgens ista fumi nubes, cum quinque naves longæ, summa maris malacia, ex proximo Morinorum portu aggressæ sunt ternas de nostris bellicis, pro maritima ora in statione collocatas: cumque post multa suorum funera, post perforatas crebris ictibus laterum compages aucti damno & dedecore in sua latibula se receperunt trepidi adversarii?

Neque vero hic solum tam candido, quid Græcis in proverbio est, oculo nos respexit propitium Numen, quin ad Hispaniæ litora nostris quoque conatibus faveret. Vix indè lætam aliquam catastrophem optabamus: cum ecce alterius famam victoriæ trepidantibus alis ad nos volitare vidimus attoniti, ereptam Hispaniæ Gibraltariam, per longum maris spatium, ad nos perferentem. At quam urbem? veteri Tarento, si a magnitudine discesseris, opportunitate situs parem: quippe quæ in ipsis Herculeis faucibus posita commo-

diffi-

diffimam nostris speculam præbeat, undè in hostiles naves, hoc interni maris limen subeuntes, facillimus detur prospectus & excursio. Quod si verò nobis ab summo Numine propolita foret conditio, poteramusne majora votis comprehendere, quam quæ cælestis favor nobis hoc in genere est largitus? urbem tantâ sitis opportunitate, tam idoneam hostilium navigiorum insidiatricem, tanto tormentorum bellicorum terrore cinctam, intra quatrimum in manus nostras esse traditam? I nunc, Gibraltariæ Præfecte urbis ad Ludovici nepotulum, jacta ferox responsum nostris deditionem poscentibus datum, proque verbis verbera relata tibi ab Anglo-Batava classe nuncia.

Haabetis depictam vobis, Audit. Hum. qualicunque colore tantorum facinorum imaginem, habetis illustrissima paucorum dierum gesta. Ex quibus quid in futurum sperare liceat de summa rerum, qua publica Sociorum causa continetur, non dubiis argumentis colligere videmur. Quem enim lætum eventum nobis non promittamus ab iis Ducibus, qui non prius armis cum hoste, quam precibus cum Deo dimicare consueverint? qui duce prudentia, comite virtute hostem superare didicerint? Quid non expectemus ab eo milite, qui per acclivos colles, per limosas paludes ad victoriam properare non refugerit? Quamobrem pleni

22 *De Prospero cursu Victoriarum*

spe ac fiducia, ex hoc prospero rerum cursu sociandam nobis Bavariam, profligandos e Germania Gallos, refocillandam Lusitaniam, cunctos denique puri piique duelli Socios optatis commodis ornandos augurabimur.

Quorum ut fiamus compotes votorum: tu Deus ter Opt. Max. hisce ad tuam sacrosanctam Majestatem suppliciiis nos advolvi patiaris. Quantis quamque insperatis tu nos oneras commoditatibus! qui copias nostras in regiones longe remotas propitio numine prosequeris: qui tantis nos victorius, hostes vero tam foedis cladibus tantisque infortunis mactas! Cui enim horum facinorum laudes adscribamus, præterquam uni tibi, Potentissime coeli terrarumque Moderator? haud nostris consiliis, viribus, sed tua solius ope, sed tua manu fracti sunt hostes fusi fugatique Agnoscimus humano majus opus. Prædicamus tuam benignitatem inexhaustam illam, qua nos indignos tua pace homunciones tam latis tam stupendis bonis cumulas. Exosculamur divina hæc tua munera, supinis manibus, defixis in coelum oculis, mente, cogitatione venerabundi. Tu incolumem ab omni malo patriam præstitisti: Tu vim hostium nostris finibus ingruentem repulisti. Quoque vel maximum coelestis favoris argumentum, Tu nobis huic bello, tantarum opum voragini, ultra modum liberalis sumptus suggestisti: cum Indicas naves, thesauris Asiaticis graves, illesas portibus nostris stitisti, ne ad anhelantem inopiam redacti bellum periculo dulcissimæ patriæ, libertatis, ipsiusque adeo defæcæ religionis deferere cogamur. Da nobis, summe Deus, propriis hisce frui bonis:

neve

neve nobis decollet alma spes, qua tu in praesentia nostros animos implevisti. Tu igitur summis patriae nostrae Patribus sanam mentem, sana consilia inspires porro, ut agitatam hisce bellorum fluctibus reipublicae navem prudenter regant magnanimi Tiphyes. Tu posthac dexter ades Ducibus, reliquias belli persecuturis. Tu fesso praелиis & itineribus militi novas vires, novos animos suffice. Nosque omnes terrore Martis immane quantum exanimatos in placidissimum tutissimae pacis portum transfer aliquando. Pro quibus meritis nos propensae tuae genua misericordiae hac votivâ tabellâ inceramus supplices: Tibi uni nos partarum victoriarum, defensae patriae, Religionis Libertatisque gloriam, mancipio ac nexu tuos, cum gratissimi testificatione animi asserturos jugiter.

D I X I.





